



tešanjski BILTEN

Interno informativno glasilo, Godina XVII, decembar 2012. Broj 55



U ovom broju:

**Konstituisano
Općinsko vijeće**



**Intervju sa Općinskim
načelnikom**

Budžet za 2013.



**Posjeta Federalnih
ministara**

**Recertifikacija po ISO
9001:2008 i 14001:2004**



Omladinski parlament

Obilježen 10. decembar

NAJAVE

- U toku je Javna rasprava po Odluci o imenovanju naziva ulica i trgova, kojom je predviđeno imenovanje novih ulica: Ulica Adema Omahaća Omaha, Ulica Saliha Sarića i Ahmetagića prolaz.

Svi zainteresovani svoje prijedloge i sugestije mogu upućivati Službi za društvene djelatnosti.

- 16. januara općinu Tešanj će posjetiti prof. dr. Halil Omanović, direktor Ureda za koordinaciju projekta u poljoprivredi FBiH (PCU) zbog razgovora o mogućem uključenju općine Tešanj u nove projekte.

- Nacrt Regulacionog plana Jelah upućen je u javnu raspravu. Javnost će imati priliku da izrazi svoje stavove tokom januara i februara. Termini predstavljanja nacrta će biti naknadno saopćeni putem općinske web stranice i lokalnih medija.

- Tokom januara očekuje se potpisivanje ugovora sa preduzećem SGI o dodjeli zemljišta za gradnju poslovnog objekta. Procijenjena vrijednost investicije je 7 milona KM, a predviđa se zapošljavanje u prvoj godini 15 novih radnika.

-U januaru je planirano formiranje Vijeća mladih. Omladinske organizacije su pozvane da se uključe u rad Vijeća. Za početak se trebaju javiti Službeniku za mlade općine Tešanj.

- Na 4. Sjednici Opinskog vijeća Tešanj na dnevnom redu bi se trebala naći Strategija razvoja općine Tešanj 2012-2018. u formi nacrta. Nakon toga će biti organizirana javna rasprava.



DODJELJUJE



"CVIJETNI PEHAR"

KLUB LJUBITELJA CVIJEĆA - TEŠANJ

za najaktivnije članstvo, najveći broj prijava
u eko akciji „Izbor najljepšeg balkona i bašte ZDK“
te najuredeniju općinu Zeničko-dobojskog kantona
u 2012. godini.



tešanjski BILTEN



Internoinformativno glasilo Općine Tešanj

Redakcija

Edina Kadušić, Ferid Mustafić, Samir Brka,
Kanita Gredelj i Bahrudin Nočić.

Glavni i odgovorni urednik

Edina Kadušić

Adresa Redakcije

Općina Tešanj, trg Alije Izetbegovića 11, 74260 Tešanj

Telefoni 032/650-341 i 032/650-022 (lokal 107),

Fax 032/650-220

E-mail press@opcina-tesanj.ba

Tiraž 2.000

Štampa: Grafik-komerc Jelah

USVOJEN BUDŽET OPĆINE TEŠANJ ZA 2013. GODINU

*Na 3. sjednici Općinskog vijeća Tešanj održanoj 28.12.2012. godine blagovremeno je usvojen Budžet Općine Tešanj za 2013. godinu.

* Budžet za 2013. godinu iznosi 10.765.000,00 KM.

* Osnovne karakteristike prihodovne strane budžeta u odnosu na 2012. godinu su sljedeće:

1. Planirano je smanjenje prihoda od indirektnih poreza, prvenstveno PDV-a, kao najznačajnijeg općinskog prihoda koji čini preko 40% ukupnih prihoda Općine. Ovo smanjenje je uzrokovano rastom vanjskog duga FBiH, koje se ogleda kroz uvećanje sredstava za servisiranje duga u odnosu na 2012. god. za 78%, odnosno 217 miliona KM. Time su sredstva za općine u startu umanjena za više od 8% u odnosu na prethodnu godinu.

2. Planirana su značajnije manja sredstva kapitalnih grantova i drugih primitaka za više od 35%, zbog evidentnog izostanka podrške viših nivoa vlasti u tekućoj godini.

3. Planiran je daleko manji prijenos sredstava za realizaciju ugovorenih, a nerealizovanih projekata za 70%, odnosno 747.000,00 KM, zbog provedene realizacije najvećeg dijela planiranih aktivnosti u 2012. godini.

4. Za narednu godinu nije predviđena realizacija planiranog kreditnog zaduženja.

* Visina i struktura prihodovne strane Budžeta je iskazana u sljedećem tabelarnom pregledu:

Redni broj	Grupa prihoda i primitaka	Plan za 2013. godinu	Procent 4/suma
1	2	3	4
1.	Direktni porezi	1.569.000,00	14,58%
2.	Indirektni porezi	4.380.000,00	40,69%
3.	Neporezni prihodi	2.483.000,00	23,07%
4.	Tekući grantovi	815.000,00	7,57%
5.	Kapitalni grantovi i primici	668.000,00	6,21%
6.	Prenesena sredstva	850.000,00	7,90%
	SVEGA PRIHODI I PRIMICI	10.765.000,00	100,00%

* Kao i u prethodnim budžetima i u ovom Budžetu zadržava se ranije uspostavljena logička struktura rashoda i izdataka kojom se obezbjeđuje nesmetano funkcionisanje administracije i mjesnih zajednica, zadržava osjetljivost za socijalna pitanja, obezbjeđuje značajna podrška nevladinom sektoru, sportskim i kulturnim aktivnostima, projektima mladih, dodatna sredstva za javne ustanove koje se finansiraju iz budžeta viših nivoa vlasti, stipendiranje studija, te nastavak podrške poticajima u lokalnoj ekonomiji (poljoprivreda i zanatstvo). Pored toga, obezbijeđene su komunalne potrebe i održavanje sve veće putne i druge infrastrukture, projekti ekološke zaštite te druge opštredruštvene potrebe. Konačno, kroz planirana kapitalna ulaganja koja se vrše izdvajanjem budžetskih sredstava, obezbjeđenjem podrške viših nivoa vlasti, te apliciranjem za dodjelu grant sredstava domaćih i međunarodnih institucija obezbjeđuje se razvoj zajednice u skladu sa usvojenom Strategijom.

* Visina i struktura rashodovne strane Budžeta iskazana je u sljedećem tabelarnom pregledu:

Redni broj	Grupa rashoda i izdataka	Plan za 2013. godinu	Procent 4/suma
1	2	3	4
1.	Sredstva za plate i naknade	2.288.000,00	21,25%
2.a	Direktni materijalni rashodi organa uprave	800.000,00	7,43%
2.b	Ostale usluge za opštredruštvene potrebe	1.406.000,00	13,06%
3.	Tekući grantovi (transferi), kamate i sredstva rezervi	3.512.000,00	32,62%
4.	Kapitalni grantovi (transferi) i izdaci	2.492.000,00	23,15%
5.	Povrat sredstava finansiranja	267.000,00	2,48%
	SVEGA RASHODI I IZDACI	10.765.000,00	100,00%

INTERVJU:

Općinski načelnik mr. sc. Suad Huskić

1. Od stupanja na dužnost Općinskog načelnika prošlo je skoro tri mjeseca. Da li ste zadovoljni zatečenim stanjem i dosadašnjim radom?

Uskoro će se napuniti tri mjeseca otkako sam preuzeo dužnost Općinskog načelnika. Primopredaja dužnosti između mene i prethodnog Načelnika gospodina Fuada Šišića izvršena je 16. novembra. Općinsko vijeće je konstituirajuću sjednicu održalo 23. novembra. I evo, od tada smo radili u punom kapacitetu.

Iz ove perspektive mogu reći da je u našoj općini, implementacija rezultata lokalnih izbora i primopredaja vlasti protekla u dobroj atmosferi, bez trošenja nepotrebnog vremena i energije. Od tada do danas desilo se mnogo toga, Vijeće je imalo 4 sjednice: usvojen je Budžet za 2013. godinu, doneseno niz drugih odluka, zaključaka i rješenja koji su bili potrebni za odvijanje normalnog života u našoj lokalnoj zajednici. Lično sam zadovoljan ambijentom, a preuzeta dužnost mi nije bila nepoznanica, pa je tako vrijeme potpunog upoznavanja sa stanjem i prilikama trajalo vrlo kratko.

U ova tri mjeseca radili smo na puno važnih stvari:

- Finalizirana je izrada Strategije razvoja općine Tešanj do 2018. godine (u nacrtu pomučena Vijeću);
- Usvojili smo Budžet za 2013. godinu;
- Završili smo istraživanje za nove količine pitke vode i obezbijedili Idejno rješenje za gradnju novih bunara;
- Završili smo izradu Idejnog projekta jedinstvenog kanalizacionog sistema za cijelu općinu i intenzivno radili na obezbjeđenju sredstava;
- Ostvarili smo kontakte i tražili podršku za različite projekte kod Austrijske i Japanske ambasade, te niz drugih organizacija iz Turske, Amerike, Holandije, Njemačke itd.
- Kontaktirali smo veliki broj domaćih institucija na federalnom i kantonalnom nivou (ministarstva, direkcije i agencije) radi realizacije određenih projekata,

I naravno, uz sve to, obavljali smo servisne poslove u administriranju potreba građana i poslovnih subjekata:

- Isplatili smo sredstva podsticaja poljoprivrednicima (290.000 KM);
- Započeli proces stipendiranja studenata (cca. 320.000 KM);
- Započeli proces ugovaranja realizacije projekata udruženja građana itd.

2. Koji su prioriteti u Vašem radu za mandat 2012-2016. godina?

Prioritete rada sam predstavljao tokom izborne kampanje a u nekom jednostavnijem prikazu riječ je o tri područja intenzivnog djelovanja i razvoja:

Ekonomija

- Dalji razvoj i unapređenje poslovne infrastrukture i uređenje poslovnih zona Glinište
- Nastavak gradnje III trake u Industrijskoj zoni Bukva
- Obezbeđenje novih investicija i otvaranje novih radnih mjesta
- Podsticanje razvoja poduzetništva kroz različite mehanizme podsticaja, javno-privatnog partnerstva, podrške za pokretanje biznisa mladih itd.
- Podrška razvoju poljoprivrede...

Ekologija

- Obezbeđenje novih količina pitke vode u vodovodnom sistemu
- Nastavak gradnje vodovodne infrastrukture (O. Planje, Medakovo-Trepče, Hrvatinići, Raduša)
- Početak gradnje jedinstvenog kanalizacionog sistema za prostor općine Tešanj
- Niz projekata u upravljanju otpadom (selektivno prikupljanje otpada, PET ambalaža...)

Mladi

- Podrška školovanju kroz stipendiranje i sl
- Podrška programima stažiranja
- Omogućavanje projekata mladih, sportskih, kulturnih i zabavnih programa

Pored nabrojanih većih aktivnosti, niz je i drugih projekata i prioriteta na nivou mjesnih zajednica, lokalne infrastrukture, tekućih projekata socijalne zaštite, razvoja obrazovanja i sl.




3. U toku je izrada objedinjene Strategije razvoja. Šta građani općine Tešanj dobijaju ovim dokumentom?

U prvom kvartalu 2013. godine očekuje nas usvajanje nove Strategije razvoja općine Tešanj do 2018 godine. U izradu ovog dokumenta je uloženo mnogo truda velikog broja ljudi iz različitih sektora i različitih znanja i iskustava. Uključeni su ljudi iz privrede, nevladinog sektora, javnih preduzeća i ustanova, organa uprave, ljudi iz kulture, zdravstva, sporta..., a sve s ciljem da se sagleda trenutni stepen razvoja naše općine, prepoznaju stvarne potrebe i mogućnosti. Ovom Strategijom objedinjuju se ranije strategije u aktivnostima koje nisu realizirane i tako se ostvaruje jedan prirodan nastavak u planiranju razvoja.

U javnoj raspravi koja će početi u januaru, svi građani ove općine i sve organizacije će imati priliku da iskažu svoje primjedbe i prijedloge i time daju svoj doprinos u odabiru najvažnijih stvari koje treba realizirati u budućnosti.

Znate, puno je potreba i stvari koje bi bilo lijepo uraditi, ali naše mogućnosti su ograničene i finansijski i u drugim resursima. Zato je važno pravilno odabrati najvažnije stvari za sve nas. Ako budemo radili sve nećemo daleko stići a rasut ćemo puno energije, a ako uradimo ono što nam je najvažnije za budućnost možemo našu općinu učiniti mnogo boljom i ljepšom. Prvi korak je da se svi uključimo u izradu dokumenta, a nakon toga svi trebamo dati svoj doprinos njegovoj realizaciji.



Zvanični rezultati za Općinskog načelnika (izbori 2012.)

4. Kada su u pitanju kapitalni projekti na području općine Tešanj, koji su ciljevi za 2013. godinu?

Kapitalne projekte bismo u osnovi mogli podijeliti na dvije vrste. Postoje oni projekti koji su od općeg interesa za sve građane (kao npr. jedinstven sistem kanalizacije) i postoje projekti koji su od interesa jedne mjesne zajednice. Za projekte od općeg interesa odabir važnosti uglavnom vrši općina, putem službi, Načelnika i Vijeća, dok odabir prioriteta u mjesnim sredinama/zajednicama vrše organi mjesne zajednice. Dakle, savjet i skupština mjesne zajednice predlažu listu prioriteta u svojoj sredini, i shodno budžetskim mogućnostima ovi projekti bivaju finansirani.

Treba reći da prioritete na nivou mjesnih zajednica nismo još utvrdili, jer čekamo da se dovrši formiranje organa mjesnih zajednica i da od njih dobijemo prijedloge za takve projekte.

Za one opće projekte smo već odabrali najvažnije i predvidjeli sredstva za njihovu realizaciju: obezbjeđenje novih količina pitke vode (150.000 KM), gradnja poslovne infrastrukture (80.000), nastavak gradnje vodovoda (300-400.000), dio komunalne i druge infrastrukture (autobuska stajališta, dječija igrališta i sl).

5. Koje aktivnosti planirate realizirati u narednom periodu u cilju ekonomskog razvoja Općine?

Šta predstavlja prioritete?

Konkretno, u prioritetima za naredni period planirani su:

- jasni projekti nastavka uređenja poslovne infrastrukture u poslovnim zonama Vila, Bukva, Ciglane i Glinište,
- obezbjeđenje pogodnosti za ulaganja u nove investicije,
- podsticaji za poslovne ideje mladih,
- podsticaji za razvoj poljoprivrednih aktivnosti,
- podrška poslovnim susretima „Sajam tešanjске privrede“ i „Sajam pčelarstva“
- obezbjeđenje novih investicija putem javno-privatnog partnerstva i emisije općinskih obveznica,
- Dalji razvoj turističke infrastrukture i uređenje grada radi višeg stepena iskorištenja turističkih potencijala općine Tešanj.
- Podršku školovanju mladih ljudi i usvajanju savremenih znanja i vještina koji mogu obezbijediti njihovu i konkurentnost poslodavaca koji ih zapošljavaju.

Tešanj danas puno znači u svijetu ekonomije. Znači kvalitet, znači brzinu i snalažljivost, sposobne i poduzetne ljude i znači osjećaj za dobar posao i predan rad. Zato je dalji razvoj uvjeta za poslovanje na prostoru općine Tešanj naš strateški prioritet., jer život (kao i razvoj općine i biznisa) je kao vožnja biciklom, treba neprestano ići naprijed, bez zaustavljanja, da se ne izgubi ravnoteža. Nije moguće držati ravnotežu stojeći u mjestu.

Vijećnici u Općinskom vijeću na Lokalnim



Predsjedavajući
Općinskog vijeća

Šišić Fuad
SDA



Alić Munevera
SBIH



Ajanović Ekrem
SBIH



Begović Rifet
LDS



Dujsić Amir
SDP



Galijašević Bernadeta
SDA



Jašić Haris
BPS



Kurdić Adem
SDA



Kaser Vedran
SDP



Lihić Adnan
SDA



Omerbašić Fahrudin
SDA



Unkić Mirza
SDP



Unkić Emir
SDP



Halilović Muhamed
BPS



Kršić Boban
SDP

Tešanj koji su osvojili mandat izborima 2012



Huskić Kasim
SDA



Hadžan Zaim
SDP



Halilović Fadil
SBIH



Hrvić Vahdet
SDA



Joldić Velid
SDA



Pilav Osman
SDA



Piro Amir
SBB



Salkić Aida
SDA




Starčević Miralem
SDP



Subašić Senad
SDA

SDA – 11 vijećnika
SDP – 7 vijećnika
S BIH – 3 vijećnika
SBB – 1 vijećnik
BPS – 2 vijećnika
LDS - 1 vijećnik



MINISTRI HALIMIĆ I MAŠIĆ U TEŠNJU

Općinu Tešanj su krajem decembra posjetila dva Federalna ministra Sanjin Halimić, Ministar razvoja, poduzetništva i obrta i Damir Mašić, Ministar obrazovanja i nauke. Ministre je primio Općinski načelnik Suad Huskić sa saradnicima za određene oblasti. Tokom obje posjete razgovarano je o projektima u 2012. godini koje su vodila ministarstva. Na sastanku sa Ministrom Halimićem, koji je došao u društvu direktora Fondacije za održivi razvoj ODRAZ Safeta Dauta i savjetnika Amira Hadžića, razgovarano je o javnim pozivima Federalnog ministarstva i Fondacije ODRAZ, tačnije o kreditnim i grant sredstvima na koje bi Općina Tešanj mogla aplicirati u narednom periodu.

Tokom sastanka sa Ministrom Mašićem, koji je bio u društvu zastupnika u Federalnom parlamentu Senada Subašića, Općinski načelnik je naglasio potrebe koje imamo u području obrazovne infrastrukture - obnova stolarije i krovova na većini škola na području općine Tešanj, zatim gradnju sportskih sala u Jablanici, Miljanovcima, Kaloševoću i Šije.

Ministri Halimić i Mašić su obećali podršku Općini Tešanj u skladu sa mogućnostima.



ISO 9001:2008 i 14001:2004

U Općini Tešanj je 27. i 28. decembra obavljena recertifikacija sistema upravljanja kvalitetom ISO 9001:2008, te godišnji nadzorni audit za sistem upravljanja okolišem po ISO 14001:2004. Audite su obavili u ime certifikacijske kuće *Bureau veritas* auditori Sanjin Konjhodžić i Alen Omerović. Kako je istaknuto na završnom sastanku, Općina Tešanj uspješno je promovirala svoje kapacitete, performanse i dobre prakse u oblasti kvaliteta pružanja usluga građanima i zadataka lokalne uprave, kao i brojna poboljšanja i rezultate u oblasti upravljanja okolišem. Ukupni rezultati oba audita bit će sadržani u ocjeni auditora koja će Općini Tešanj biti dostavljena u narednim danima.

RASKRSNICA JELAH: RASKID UGOVORA

Nakon usvajanja i potpisivanja Protokola od 05.03.2010. godine o zajedničkom učešću u realizaciji projekta o rekonstrukciji raskrsnice cesta M 4 i R 474 i izgradnji priključka na magistralnu cestu M 4 sa regionalne ceste R 474 sa semaforizacijom, Općina Tešanj je pristupila finansiranju izrade Glavnog projekta i pribavljanju potrebnih saglasnosti.

Potpisnici Protokola su JP CESTE Federacije BiH, Kantonalna Direkcija za ceste i Općina Tešanj.

Obaveza Općine je bila da plati projekat i obezbijedi finansijsko učešće u radovima. Općina je svoje obaveze ispunila. Platila projekat i rezervisala sredstva za izvođenje radova.

Kantonalna Direkcija za ceste je provela proceduru javne nabavke za građevinski dio radova (bez učešća Općine u postupku) i 12.09.2012. godine potpisan je Ugovor o izvođenju radova sa firmom "Hajdić" d.o.o. Maglaj.

Kako odabrani Izvođač nije u planiranom roku uveden u posao, Općinski načelnik je poslao Upit Kantonalnoj Direkciji za ceste o datumu uvođenja Izvođača u posao i razlozima kašnjenja početka radova. Međutim, 13.12.2012. godine od Kantonalne Direkcije za ceste je došla Izjava o jednostranom raskidu Ugovora, jer ponuda ponuđača nije pokrivena bezuslovnom bankarskom garancijom.

Općina Tešanj će planirati u budžetu za 2013. godinu Protokolom predviđena sredstva i tražiti od Kantonalne Direkcije za ceste da u što kraćem roku pokrene ponovnu proceduru Javne nabavke.



OBILJEŽEN 10. DECEMBAR - DAN GRADA TEŠNJA

Povodom općinskog praznika, 10. decembra - Dana grada Tešnja, Općinski načelnik Suad Huskić je u restoranu *Kahva* upriličio prijem, kojem su prisustvovali predsjedavajući Općinskog vijeća, Glavni imam MIZ Tešanj, zastupnici na državnom, federalnom i kantonalnom nivou, predstavnici političkih partija, kao i direktori javnih ustanova i preduzeća. Nakon prijema, Općinski načelnik je u društvu zvanica obišao i mezar Gazi Ferhad-bega.



Također, povodom 10. decembra upriličeno je i svečano puštanje u rad toplovođa i podstanice u objektu Srednjoškolskog centra u Tešnju. Predstavnici Aktiva direktora uručili su zahvalnice Općinskom načelniku i direktoru Toplane za uspješno okončan projekat *Toplifikacije srednjih škola*.

Inače, prema odluci Općinskog vijeća Tešanj, općinski praznik 10. decembar sjećanje je na daleku prošlost kada je vakif Gazi Ferhad-beg utemeljio Tešanj kao urbanu sredinu.

OMLADINSKI PARLAMENT

U Sali Općinskog vijeća Tešanj održana je Konstituirajuća sjednica Omladinskog parlamenta za 2013. godinu. Na sjednici su prisustvovala 22 učenika vijećnika uz pratnju koordinatora projekta iz osnovnih i srednjih škola.

Rad Omladinskog parlamenta je bio uspješan. Drago mi je što mladi imaju priliku da se uključe u jednu političku organizaciju i da kroz svoj rad doprinose razvoju cijele zajednice, kazala je Senaida Karagić, koordinator projekta Omladinskog parlamenta.

Prisutni učenici vijećnici su dali svečanu izjavu kojom se obavezuju da će dužnost obavljati savjesno i odgovorno, te da će se zalagati za razvoj u najboljem interesu svih građana, naročito djece i omladine u cilju razvoja i napretka općine Tešanj i BiH.

Za predsjedavajućeg Omladinskog parlamenta za 2013. godinu izabrana je Mediha Hadžikadunić, za zamjenika Amir Delić, a za sekretara je izabrana Lea Zulić.

Prethodna godina je bila jako uspješna. Naravno, bilo je teško rad Parlamenta uskladiti sa drugim obavezama. Međutim, Omladinski parlament mi je pružio priliku da se uključim više u politiku i organizaciju projekata, kazala je predsjedavajuća Mediha Hadžikadunić.



OMLADINSKA BANKA TEŠANJ

Predstavnica Fondacije Mozaik Armela Ramić i članovi kreditnog odbora su u Sali Općinskog vijeća Tešanj uručili zahvalnice za realizovane projekte u okviru Omladinske banke koja u Tešnju djeluje od 2008. godine. Zlatne, srebrne i bronzane zahvalnice dobili su članovi odbora Omladinske banke Tešanj, kao i donatori koji su pomogli novčanim sredstvima pri realizaciji projekata.

Kroz ovaj projekat u Tešnju pokriven je veliki broj zajednica gdje mladi mogu da iznesu svoje ideje, i kako je istakla predstavnica Fondacije Mozaik Armela Ramić *svi žele da rade kao mladi u Tešnju*. Ovom prilikom, prigodnim govorom, prisutnima se obratio i Općinski načelnik Suad Huskić koji je istakao da je Općina Tešanj među prvima krenula u ovaj projekat, te razvila mogućnost aktiviranja mladih u nove projekte.

U okviru Omladinske banke Tešanj u 2012. godini je realizovano 9 projekata mladih, koji su realizovani u periodu od juna do novembra na području općine Tešanj. Ukupna vrijednost realizovanih projekata iznosi 32.703 KM, od čega iz fonda Omladinske banke Tešanj je obezbijeđeno 12.547,73 KM, a neformalne grupe mladih su obezbijedile ukupno 18.527,00 KM kroz mobilizaciju lokalnih resursa. U realizaciji ovih projekata je učestvovalo više od 120 volontera koji su doprinijeli sa više od 1700 volonterskih sati, a ukupan broj korisnika ovih projekata je oko 2300.



KONSTITUISANJE ORGANA MJESNIH ZAJEDNICA

Općinski načelnik Suad Huskić, u prisustvu saradnika u petak, 11. januara uručio je rješenja predsjednicima savjeta deset mjesnih zajednica koje su okončale proces konstituisanja organa mjesnih zajednica i imenovanje rukovodstva. Rješenja su primili: Esmir Bašić (MZ Bobare-Drinčići-Blaževci), Hamza Hotić (MZ Dobropolje-Mekiš), Kenan Turkeš (MZ Dž. Planje), Ismet Zeničanin (MZ Jelah), Emir Dizdarević (MZ Jevadžije), Nihad Ibrahimkadić (MZ Ljetinić), Enes Čostović (MZ Medakovo), Zehrudin Kruško (MZ Miljanovci), Senad Hatkić (MZ O. Planje) i Esad Mujagić (MZ Tešanjka).

Ostale mjesne zajednice imaju obavezu u mjesecu januaru da završe proces formiranja organa mjesnih zajednica kako bi se taj proces priveo kraju, kazao je Općinski načelnik Suad Huskić.



SASTANAK SA UDRUŽENJEM PRIVREDNIKA

Općinski načelnik Suad Huskić i pomoćnik Općinskog načelnika za finansije i ekonomiju Hamzalija Hojkurić u decembru su se sastali sa delegacijom Udruženja privrednika na čelu sa predsjednikom Udruženja Osmom Saračevićem. Ovo je prvi zvanični sastanak Općinskog načelnika sa privrednicima, na kojem je razgovarano o dosadašnjoj i budućoj međusobnoj saradnji, kao i o aktuelnim poslovnim zonama i poštovanju ekoloških standarda. Ovom

prilikom, privrednici su obećali i nastavak saradnje sa Općinom kada je u pitanju uređenje grada, kao i podrška manifestacijama.



TOPLIFIKACIJA SREDNJIH ŠKOLA

U ponedjeljak, 10. decembra, povodom Dana grada Tešnja, uz veliki broj zvaničnika, svečano je pušten u rad završeni toplovod i podstanica u objektu Srednjoškolskog centra u Tešnju.

Tokom novembra izvođeni su mašinski radovi i probno ispitivanje, a u decembru i puštanje toplovođa u funkciju. U narednom periodu (čim vremenski uslovi to dozvole) slijede građevinski radovi - zatrpavanje i asfaltiranje.

Općina Tešanj nastavlja realizirati usvojene strateške ciljeve, a izgradnjom ovog toplovođa omogućeno je, osim srednjim školama, i ostalim građanima na tom području priključak na toplotnu energiju.



VODOVODI MEDAKOVO-TREPČE I ORAŠ PLANJE

U toku su radovi za projekat izgradnje rezervoara R2 i R4 na vodovodu Medakovo-Trepče. Izvođač radova je Konzorcij Nedjing doo Tešanj i AB-trans doo Tešanj, a nadzor vrši Stil-projekt doo Zavidovići. Nadzor je zadovoljan dinamikom izvođenja radova - rezervoar R2 u Medakovu je u završnoj fazi, a na rezervoaru R4 u Trepču je završen iskop i planira se početi sa betonskim radovima ukoliko to budu dozvoljavali vremenski uslovi. Vrijednost ugovorenih radova je cca 140.000,00 KM a finansiraju se iz sredstava vodnih naknada i djelimično iz sredstava građana.

U srijedu, 5.12.2012. godine održan je sastanak u Oraš Planjama, a u vezi realizacije ugovora koji je potpisan između Općine Tešanj, Ministarstva za poljoprivredu, vodoprivredu i šumarstvo ZDK i izvođača ŠF-inžinjering doo iz Tuzle. Tema sastanka je bila uvođenje u posao izvođača, a prisutni su bili predstavnici Izvođača, ovlašteni nadzor Ibis doo Zavidovići kojeg je imenovalo Kantonano ministarstvo, predstavnici Općine i predstavnici mjesne zajednice Oraš Planje. Dogovoreno je da Izvođač izvrši iskoličenje trase i počne sa radovima. Realizacijom ovog Ugovora, postrojenje za tretman voda će biti pušteno u funkciju. Vrijednost radova je 128 000 KM.



ČIŠĆENJE TERENA OD KASJETNE MUNICIJE



Tokom 2012. godine završena su tri projekta na čišćenju terena od zaostale kasetne municije na području općine Tešanj. Naime, *HO Norveška narodna pomoć* je, kao izvođač deminiranja, polovinom avgusta mjeseca započela deminiranje na području Cerovca, na površini od 63.460 m², a zatim nastavila na području Trepča na površini od 24.250 m². Tokom decembra završen je i treći projektni zadatak na području Bukve (područje iza Vatrogasnog doma) na površini od 51.870 m². Na ovom projektnom zadatku provedeno je tehničko izviđanje na površini od 28.530 m² i


čišćenje na površini od 23.340 m². Pronađeno je i uništeno 16 komada kasetne municije KB-1 i 2 komada neeksploziviranih ubojnih sredstava (NUS). Obzirom na loše vremenske uslove, četvrti projekat koji se odnosi na područje Tešanjke, je odgođen do boljih vremenskih uslova. Projekte je finansirala Vlada Kraljevine Norveške putem *HO Norveška narodna pomoć*.

STANICA ZA MJERENJE ZAGAĐENOSTI ZRAKA I UZORKOVANJE ZEMLJIŠTA

Tokom mjeseca novembra od strane *Metalurškog instituta „Kemal Kapetanović“ Zenica*, na zahtjev Općine Tešanj, u krugu preduzeća „Pobjeda“ u Bukvi, bila je postavljena mobilna stanica za mjerenje zagađenosti zraka. Instaliranje ove mobilne stanice predstavljalo je drugi krug mjerenja zagađenosti zraka na području općine Tešanj, sa ciljem dobijanja relevantnih podataka vrijednosti polutanata u zraku u zimskom periodu. U toku su aktivnosti na izradi analize izmjerenih vrijednosti.

Pored navedenih u novembru su provedene i aktivnosti na detaljnijem uzorkovanju zemljišta prvenstveno na poljoprivrednom području. Za analizu je uzeto područje Jevadžija. Predstavници Federalnog agropedološkog zavoda su uzeli dodatne uzorke na tri lokacije, a u toku je analitička obrada uzoraka u skladu sa procedurama i standardima iz ove oblasti. Navedene aktivnosti se provode u okviru ciljeva Strategije za dostizanje vizije - *Tešanj, sredina ekološke svijesti, čistoće i reda*.





Općina Tešanj

www.opcina-tesanj.ba

2013